



vea porotetani

te autonomi no te ekalesia



Te mahana matamua no setepa i te matahiti 1963 ra, o te hoê ia mahana rahi no te Ekalesia. Inaha i te reira taio te horoaraa-hia mai te faatereraa no te Ekalesia Evanelia i te maohi iho, oia ia, te mahana i mana'o ai te pû faatereraa no Paris e ua paari te tamarii ta'na i faafanau e i aupuru, no te haapa'o ia'na iho ; te tau no te autonomi.

Eaha hoi te auraa no teie tiaraa autonomi ? I ta te hoê hioraa o te tiaraa ia tei horo'a ia oe i te tiamâraa no te parau, E aore ia Aita i te mau mea tei au aore ia tei ore i au i te huru ta oe i mana'o e i opua no to oe iho oraraa : tei ia oe te parau ! tei ia oe te maiti ! Teie ia ; te horo'araa ia vetahi ê i te autonomi o te horo'araa ia ia'na i "te mana no te parau". E na teie horo'a e haapapû i to tatou iteraa ia vetahi ê ei taata paari, e i to tatou ato'a faaiteraa e ua riro tatou iho ei taata paari.

Te vahi faufaa ta te Autonomi e heheu mai nei ia tatou teie ia ; ua riro na pae ato'a e piti, tei horo'a e tei farii,ei "fatu no te parau". E ere atura ia teie tiaraa no te haru mai e o oe anae ra te fatu i te parau, no te" horo'a râ i te parau" . Inaha hoi na roto i to oe faaiteraa, e parau ato'a ta to taata tupu e itehia'i to oe paari eiaha râ na roto i te haamamû ia'na. Ia tapea oe i te parau ei ia oe anae ra , tapao faaite ia e aore â oe i ô atura i roto i te tiaraa autonomi. Ua roaa mau anei teie tiaraa i te Ekalesia Evanelia ?

HIRO Henri.